

REGIONAL NEWS

HEADLINES:-

1. Sinlung Hills Council inthlan thlaleh ni 5 a neih tur atan Political party ten campaign beihpui an thlak tan.
2. Sorkar laipui scheme, PM Gati Shakti chungchang vawiin khan Mizoram Assembly Conference Hall-ah inzirtir a ni.
3. Election Commission of India chuan Maharastra leh Jharkhand Assembly inthlan hun tur vawiin khan a puang.
4. Chief Election Commissioner Rajiv Kumar chuan Electronic Voting Machine chu zaa za rintlak anih thu a sawi nawn.

<><><>

SHC CAMPAIGN KICK OFF

Sinlung Hills Council inthlan thlaleh ni 5 a neih tur atan Political party ten campaign beihpui an thlak tan a.

Zoram People's Movement Party (ZPM) leh Hmar People's Convention (HPC) tang dunte chuan vawiin khan Sakawrdai, Saiphai leh Suangpuilawnahte Campaign beihpui an thlak a, he hunah hian Chief Minister Pu Lalduhoma, Home Minister Pu K.Sadanga leh Supply Minister Pu B.Lalchhanzova ten hun an hmanpui.

Chief Minister Pu Lalduhoma chuan, he council tan hian sawrkar hmasa huna laiin cheng nuai 150 an pe thin a, a bei tham hle tih an hriatin Sorkar thar chuan cheng nuai 150 bakah nuai 190 an pek belh a, chumai bakah Lok Sabha MP Pu Richard Vanlalmangaiha MP Fund atangin cheng nuai 75 pek an ni bawk a ni a ti a, Sorkar thar chuan, Tuivai lei siamthat hna a ngaipawimawh em em a, hmanraw thar hmangin tunah siam a ni ta a, he lei hi ei leh bar chawkluhna kawng pawimawh tak leh Manipur a awmte nen inkalpawhna kawng pawimawh tak a ni, a ti.

Suangpuilawn ah Home minister Pu K. Sapdanga pawhin campaign thusawiin ngampa taka khawtlang leh council mamawhte thlen theitu turin sorkar-na fawng chelh mek party te thlan thlantlin hi a finthlak hle a ti a, thawh hona a that loh chuan hmasawna hnuhchhuah turte pawh a muang thin a, mipuiin an tuar a, hruaitute tan pawh a hrehawm thin a, chuvangin hun inher mila vote pawh thlak thiam a pawimawh a ti.

Saiphai khua-ah ZPM campaign hawna BNRGSK Hall-ah neih a ni a, he huna thu sawitu Supply Minister Pu B.Lalchhanzova chuan, Ram rorelna a kal dik chuan ngaihsak loh bik, thlauhthlak bik an awm tur a ni lo a, Sinlung Hills Development Council inthlan lo awm tur ah pawh hian Development Council mipui hmangaihtu thlan chhuah ngei an beisei a ti a, Ram zahawm leh hnam zahawm ni turin ration card siamthat hna kal pui mek a ni a, mahni veng leh khua theuhah tute chungkua nge tanpui mamawh zual bik ti a thlei bik neilo a Ration Card endik hna hi kalpui ngam angai a ti. Miharsa zawk ration card vâra awm mêk ration man thara khulte lo mangang lo se, sawrkâr chuan theihtawpin a en fel chho zel a, ZPM sawrkâr chuan a tih dik hna a thawk zêl dawn a ni a ti.

Sinlung Hills Council General Election lo awm tura thawk dun ZPM Party leh HPC te hian SHC-a bial 12 awmah candidate tur an ruat fel vek tawh bawk a ni.

MNF Party pawhin Sinlung Hills Council General Election pualin khaw hrang hrangah campaign an hawng a. Sakawrdai-a Campaign hawannaah Opposition Leader Pu Lalchhandama Ralte chuan thu sawiin, ZPM hian State ah sorkar mah se, chhung tin thleng phak thiltih engmah an nei lo a ti a. Thil eng eng emaw zuarin, eng ang policy pawh duangin mipui lakah intiamna hrang hrang nei thin mah se, pawisa an nei lo a, mipui bum nan an sawi mai mai a ni, a ti. Party dangin thlêmna chi tinreng hmangin an la rawn thlêm dâwn a, sorkar thla 10 an hrawn chhûngin an ti ang an tih engmah an ti lo a ti.

Pu Lalchhandama chuan, MNF sorkar chu engmah ti lovah an puh leh dawn a, amaherawhchu an sawrkar laiin New Vervek aṅanga Tuivai inkar motor kal thei tawh lo black top-in an siam ṭha leh vek a ni a ti. COVID avanga hna an thawh theih loh te, chhunzawma hmala anga insawiin ZPM chuan par a chhuang dâwn a, amaherawhchu a bul an ṭan a, an bawkzui a nih chuan a lawmawm a ni a ti.

MNF sorkar chuan hmar thimpui tih thin ah eng a hmuhtir ṭan a, an eng telh telh a, zirna lamah emaw, kawng chi kimin hmalam an pan tawh a, tunah erawh hmasawna an hmuh tawh sa, a ṭhuanṭhu leh mêk zawk a ti a ni

Sinlung Hills Council General Election lo awm turah hian MNF leh HPC (R) an thawk dun dawn a ni.

<><><>

PMAY

Sorkar laipui hnuaia Thingtlang mirethei In sak tanpuina Pradhan Mantri Gramin Awas Yojana PMAY(G) chu Mizoramah pawh kalpui mek a ni a, tunah hian sorkar laipui atanga sum hmuh za zela zaa 70.03 chu pek chhuah a ni tawh.

Akashvani Aizawl thu dawn danin, sorkar kum 2023-24 atan Mizoram chuan PMAY atan hian kumin March thla khan cheng nuaih 5178 leh sing sarih sang nga a dawng a, state sorkar chuan a hun takah sum hi pe chhuak nghalin a hmanna tura hman nghal a ni.

Rural Development Department Director Pu K. Lalrohlua sawi danin, state sorkarin a tum ve tur cheng nuaih 575 sing li leh sang hnih chu tunah hian Finance Department lamah bawhzui mek a ni a, state nodal account lamah a luh thuai beisei a ni a ti a, SECC 2011 data hmanga dawng tur ten an dawn fel hnuaah Awaas plus 2018 a thlan chhuah ten in sak tanpuina hi an dawng mek a ni, a ti bawk.

PMAY hi Mizoram chhunga district 11-ah te kalkpui vek niin, district pathum - Aizawl, Khawzawl leh Saitualah te chuan pawisa pek chhuah tur hi pek kim a ni tawh a, district dang pariatah erawh pek kim a la ni lo thung.

PMAY (G) In sak tanpuina hi kum 5 dang atan pawhsei leh tura Union Cabinet chuan kumin August thla khan a pawmpui tawh a ni a, kum 2028-29 thleng a huam ang. Tunah hian a chhunzawmna tur buaipui mek niin, BDO tin ten hemi atana a thawk tur te VLAA te registration PMAY(G) portal ah an nei mek a, hemi tih fel a nih hun ah PMAY(G) dawng tur te hi thlan thar a ni ang.

<><><>

PM GATI SHAKTI

Sorkar laipui scheme, PM Gati Shakti Mizorama hman ve tur chungchang vawiin khan Mizoram Assembly Conference Hall-ah inzirtir a ni.

He hun hi Bhaskaracharya National Institute of Space Applications and Geo-Informatics (BISAG-N) leh Ministry of Development of North Eastern Region (MDoNER) te bultum niin, Mizoram sorkar hnuai Department 40 aiawhte an tel a ni.

Planning and Programme Implementation Department Secretary Pu Lalmalsawma Pachuau chuan, PM Gati Shakti portal chu Mizorama department hrang hrang ten an hriatthiam tawk loh vanga an la chhawr tangkai tawk loh thu tarlangin, workshop neih zawh hunah chuan Geographic Information System (GIS) behchhanin project te an siam tawh ang a, project insiamthuah palh leh dik lo te a awm tawh dawn lo a ni, a ti. Concept paper leh DPR te kenga Delhi kalpui thin te, e-mail leh Dâk hmanga thawn thin te, bawhzui ngai thin te chu online hmangin a tih theih vek tawh dawn a ni, a ti bawk.

MDoNER (IT) Senior Director Pu Vivek Gupta chuan hnuai hmalakna peng pakhat "Poorvottar Vikas setu" chu India hmarchhak state 8 te puala siam a ni a, Poorvottar Vikas Setu tih chu - India hmarchhak state ten India ram state dang te ruala hmasawna rahbi an tuk ve theih nana, sorkar laipui nena thlun zawmtu Lei tihna a ni tiin, Poorvottar Vikas Setu portal kaltlanga Project hrang hrang buaipui dan leh a kaihnawih thil pawimawh hrang hrang te a tarlang a ni.

He workshop-ah hian Poorvottar Vikas Setu Portal hman dan te zir niin, MDoNER Gati Shakti Portal leh Single Mater Plan (SMP) portals live demonstration te neih a ni a. Sawihona hun leh zawhna leh chhanna hun te hman a ni bawk.

<><><>

CYBER CRIME WORKSHOP

Home Department leh MJA Gen Hqrs tangkawp buatsaih in Seminar on Cyber Crime chu vawiin khan Kolasib Press Club-ah neih a ni.

He hun hi Kolasib bialtu MLA, Dy. Speaker Pu Lalfamkima chuan a hman pui a. Thusawiinn, tunlai khawvelah internet a tha tawh a, mi zawng zawngin mobile phone an nei tawh a. Hetih lai hian mi tam takin inbum nan leh midangte paw sawi nan an hmang mek a. Heng mi bum chingte laka fimkhur a ngai hle a. Mi nawlpuite hi hetiang lama thiamna nei lo an nih avangin MJA leh Mizoram Police-ten Cyber Crime chungchang inzirna in buatsaih chu lawmawm a ti.

Dy Speaker chuan, Online-a suahsual rawngbawlina hrang hrang chungchang an inzirtir rual hian an mobile phone-te chu sual tih nan leh misualte inbumtirna hmanrua a hmang lovin, tangkai zawka hman dan inzirtir pawh a tul hle a ni, a ti bawk.

Aizawl SP (Cyber Crime) Pu VL Lura Hauzel pawhin thu sawiin, Mizoram-ah online hmanga sum inchhuhsakna, sex hmanga in inbumna, online-a mipat hmeichhiatna lama naupangte lantirna leh social media-a mi tihmualphona thil hrang hrang a tam tawh hle a ti a. Hemi lam buaipuitu Police-te chu an tlem thu leh cyber crime case hi kan buaipui hneh lo lek

lek a ni, a ti a. Hemi kawnga an hmalaknaah sorkar, MJA leh tlawmngai pawlte chu thawhpuiah a sawm a ni.

<><><>

MAHARASTRA & JHARKHAND ELECTION

Election Commission of India chuan Maharashtra leh Jharkhand Assembly inthlan hun tur vawiin khan a puang. Maharashtra-ah hian Assembly bial 288 ah inthlan hi thawh khata neih tur niin November ni 20 ah inthlan buatsaih a ni dawn a. Bial 81 awmna Jharkhand-ah hian thawh hnihin November ni 13 leh ni 20 ah Assembly inthlan buatsaih a ni thung ang. Heng bakah hian State 15 huamchhunga Assembly bial 48 leh Lok Sabha seat 2 by-election te November ni 13 leh ni 20 ah buatsiah nghal a ni ang a. Inthlana vote tla te hi November ni 23 ah chhiar a ni ang.

<><><>

EAM IN ISLAMABAD

External Affairs Minister Dr.S.Jaishankar-a chuan vawiin khan ni hnih chama Shanghai Cooperation Organisation (SCO) Summit hmang turin Islamabad a pan. Pu Jaishankar-a chuan Pakistan-a a zin turah hian ramdangte nena inlaichinna sawiho tura kal anih thu leh Pakistan nen erawh chuan ram pahnih bil inbiakna an nei dawn lo a ti a. Tun tum hi kum kaw hnua Indian Foreign Minister-in Pakistan a tlawh leh hmasak ber tur a ni.

Shanghai Cooperation Organisation (SCO) hi khawvel ram hrang hrang intelkhawmna a ni a. Member ram pakua - India, Iran, Kazakhstan, China, Kyrgyz Republic, Pakistan, Russia, Tajikistan, leh Uzbekistan te an awm a. Politics, sumdawna, eibar zawna, zirbingna, technology leh culture lama thawhhona a ni.

<><><>

CEC ON EVM

Chief Election Commissioner Rajiv Kumar chuan Electronic Voting Machine chu zaa za rintlak anih thu a sawi nawn. Vawiina New Delhi-a chanchinbumite a kawmnaah Pu Kumar-a chuan Opposition lamin EVM chu khawih danglam theih nia an puhna chhangletin EVM khawl chu khawih danglam theih anih loh thu a sawi a. Congress Party bakah Opposition party dangte chuan tunhnaiah EVM hi an sawisel nasa hle a. Haryana Assembly inthlan zawh takah EVM chungchangah inhnialna a awm leh a. Congress hruaitute chuan EVM hi nasa takin an bei leh a ni.

<><><>